

•sanjvwnz•

Gingjsaek Daegbied

别 样 的 风 景

□ Luz Vanjcinh / 陆婉珍

Haetromh seizhah, gou ngamq ndiu gvaqdaeuj, baez byaengqda, song da moengzloengz, couh dingqnyei gij sing fwn seizhah “sasasa……” ndek-ndak gwnz gingq congheueg, baez sijsaeq yawj, gij fwn lumj lwgnyez guhlaeuh nei, baez bungq daengz naj gingq youh fwt comz baenz diuzdiuz dah iq, riengjret lae roengz daizdangq bae, lumj cinglingz nei gig dwggyaez.

Raq fwn seizhah neix daj haemhlwenz couh doek, seizneix menhmenh bienq iq lo. De gaeng nyinh laj namh ndaej dumzdwddwd, vanzlij unqswnh lumj dahsau nei, laebdaeb dingz youq gwnz mbwn baenzlai nanz lij sij mbouj ndaej lizbae dem.

Gou gig gyaiez gij fwn iq seizhah, de lumj baux dahsau nei, dwggyaez, unqswnh caemhcai gyaunde, aen-vih de mboujdan nyinh fanhfaed lajbiengz, hawj vunz daiq daeuj liengzyauj, vanzlij dongswiq ndawsim gou, hawj gij simfanz fouzfengh gou ndaej vut daengz gizgyae bae.

Mbouj geij nanz, gij fwn yied doek yied iq, seizneix dinglingz ciep dawz dena, miz geij baux baengzyoux gyaiez ingj siengq ngamq daj gizgyae daeuj daengz. Gyoengqde daeuj ranz-mbanj gou, yaek bae youz Siz-vandasanh Swnhlinz Gunghyenz, siengj ingj cuj siengq funggingj seizhah he. Gou angqvauvau, gag siengi: Raq fwn seizhah ngamq doek gvaq, seizneix bae gizde youz, wngdang miz gingjsaek caeuj bingz-seiz mbouj doxdoengz bw!

Siengj daengz gizneix, gou couh sikhaek okbae ciep gyoengq baengzyoux de, dou geij baux couh hai ci bae cimhra gij gingjsaek daegbied lo.

Dou geij aen ci doxriengz buet youq gwnz lohyoubek mogndaem youh seuqsak. Diuz loh neix miz giz bingzrwdrwd, miz giz cix ngut-ngeungeu, gij ranzmbanj mizseiz daj ndaw bya ndaw ndoeng mumjgyumq ndonj ok baihnaj dou. Dou maez youq ndaw rumz singisien caeuj gij gingj gyaunde ndawde, itloh haengjheiq cung haeuj ndaw rungj Sizvandasanh Swnhlinz Gunghyenz bae, ndawsim cungj dwg maqmuengh.

Ci hai daengz byongh roen giz uteuj he, gyaegyaie couh ndaej raen gij nditrongh cingq laeglemx hawj gyoengq bya biengj gaiq baengz-goebgyaeuj hausaksak hwnjdaeuj, gyoengq bya menhmenh loh ok gij

yiengh dahsau najnyaenq——Va! Gyoengq bya heuswdsd, seuqsatsat, raq rumz he ci gvaqdaeuj, hoengheiq youh nyinh youh singisien couh lumj cinglingz guhlaeuh nei ndonj haeuj ndaw ndaeng. Gij homsien doenghgo hix daj seiqlengq yaenx haeuj ndaeng dou, hawj dou ndawsim humznyub-nyub, angqvauvau…… Aen vamingz gunghyenz neix heuhguh “Singz-yangji”, caen deng dahraix, gvaieq mbouj ndaej ciuyinx ndaej baenzlai vunz diegrog daeuj daengz gizneix dangdien capyingz supsou yangji lo.

Henz loh bya sang goengq dab goengq, fwjmok menhmenh swng hwnjdaeuj, geujheux youq ndaw lueg ndaw bya, yaep ndeu youh fwt swng fwt comz, lumj gyoengq dahsien ndang daenj vunz couz, fwngz dawz baengzsei hausaksak youq laj ndaw ndit hajsak ciengq go diuqfoux, youh dep youh liz, yaek raen mbouj raen, mokmumu caemhcai biufefe, hawj vunz lumj haeuj diegsien bae nei. Gyoengq baengzyoux nyaenx mbouj ndaej dingz ci roengzdaeuj, gingz hwnj aen sienggi ingj mbouj dingz, lau baez yaep da couh lauqgvaq gij gingj yaepyet lai bienq neix bae.

Lij caengz yawj gaeuq gij gingj gyaunde henz loh gyoengq bya, mbouj rox mbouj nyinh couh daeuj daengz bakdou Sizvandasanh Swnhlinz Gunghyenz lo.

Baez haeuj bakdou, fwt miz benq saek heucing he saenqrwenz gou lo——Gij haenx dwg benq faexraeu singisien gauhyaj ndeu. Gyaegyaie muengh bae, baenz go baenz go faexraeu hungloetloet sangswdsd daj boznywj daengj youq gwnz dieg, bongh hwnj gwnz mbwn. Ganjfaex saekdaep, ngafaex mbe gvangq seiqlengq, yaemhyangq mbouj doxdoengz. Baenz go baenz go faexraeu neix couh lumj baenz aen baenz aen liengj heu hungmbwk nei, gij mbawraeu youq ndaw rumz laj ndit haetromh fub-fedfed, ronghswgswg, gig miz cing-saenz, gyoengqde caeuj gyoengq bya sang ndoengfaex mwncupcup dox-baengh doxhuz, caemhcai youh gak miz daegsaek.

“Couhdwg gizneix lo, gaxgonq ingj le faexraeu seizcou, seizneix dwg haetromh, fwnraq ngamq gvaq, dwg seiz ceiqnede, gou aeu cagaen ingj cuj siengq faexraeu seizhah ndeu, caiq bae camgya gij doxdax ingj cij ndaej!”

Boux baengzyoux he angqyangz gangj.

Seizneix gou cij geiq hwnj bi-gvaq de ingj cuj mbawsiengq faexraeu seizcou gyaunde he, youq ndaw baengzyouxgien riuz ndaej youh vaiq youh gvangq, byawz raen le cungj haenh. Couhdwg gij mbawsiengq neix yinx ndaej gyoengq cangh’ ingj laeblaeb daeuj daengz gizneix ingj siengq, bonjlai seizcou dwg seizdamh Sizvandasanh Swnhlinz Gunghyenz, baenzneix hix nauhyied hwnjdaeuj lo, gij yiengh neix gaxgonq cungj mbouj miz gvaq.

Seizneix, gou cij fwt roxnyinh: Gaxgonq, swhgeij baez daengz Siz-vandasanh Swnhlinz Gunghyenz, cungj laepda cung haeuj baihdaw bae, laihnaeuz gij gingj gyaunde bietdingh youq baihdaw……

Danghnaeuz mbouj dwg caeuj gyoengq baengzyoux caez daeuj, gou cungj mbouj rox gizneix hix dwg giz gingjsaek gyaunde ndeu dem, cadi youh lauqgvaq lo. Sijsaeq siengjsiengj, seiqvunz raeuz miz geijlai baez aenvih “gou laihnaeuz” lauqgvaq le gij gingjsaek gyaunde ni?

Gou doq ngeix doq ngiengxgyaeuj cimyawj gij faexraeu dangqnaj neix.

Mwh gou naengh youq gaiq rin laj goraeu hung yietbaeg seiz, dauqngex gizneix couhdwg dieg baengzyoux bi’ gvaq seizcou ingj siengq haenx lo. Gou dawz soujgih okdaeuj ra gij siengq gaxgonq de ingj, yaek aeu daeuj guh doxbeij baez he, yawjyawj bi he gvaqbae lo, gizneix miz maz mbouj doxdoengz.

Ndaw siengq mwhde dwg seizcou, hix dwg haetromh, mbwn seuq mbwn sang, gij mbawraeu deng mwi nyumx ndaej ndinggeq, rumzcou baez ci gvaqdaeuj, gij mbawraeu couh lumj raemxlangh nding nei fubfed mbouj dingz. Lij miz mbaw siengq he daj dieg daemq ingj doxhwnj, gij mbawraeu youq laj nditndongq henj-rwgrwg, lwenqda dangqmaz, yawj mbawsiengq lumjbaenz couh ndaej raen goraeu ning nei……

Gvaieq mbouj ndaej Dangzciuz canghsei Du Muz sij sei haenh——“Mbawraeu nding gvaq va ndwen-ngeih”. Canghsei dwg danq mbawraeu seizcou oq beij va seizcin, caemhcai mbouj lumj gofaex gizyawz ndoq-ndangndang. Seizneix gou ndaej raen mbawraeu seizhah mwncupcup, hoenghhdwd, mbouj beij gofaex wng ngoenh bw! Gou nyinhnaeuz

faexraeu youq seizhah lumj bouxbing, ndwn youq bakdou gunghyenz, aeu ndang cangq de dawz hen, youq seizcou cix bienqbaenz baux dahsau ndeu, daenj geu buhvaq hoengzfodfod, yunghrengz diuqfoux gwn laeuj haengq daeuj dingj nit.

Gou nyaenx mbouj ndaej iet fwngz dawz nye faexraeu iq he, siengj aeu daeuj cimyawj. Siengj mbouj daengz dauq ngaiz gij raemxfwn ndik rim gyauej rim ndang bae, daengx ndang cungj caepcatcat caez.

Gij Mbawraeu lumj fajfwngz, gij megloh seuqcingx raixcaix, vangraeh doxgap, mbawmbaw heusausau, oi- nomj youh nanet.

Gou gip geij mbaw raeu gwnz namh, aeu fwngz nu geij baez, gij hom mbawraeu daegbied sikhaek ndonj haeuj ndaw ndaeng daeuj, mbouj mup hix gag hom. Gij saek, gij yiengh, gij hom de iemq haeuj ndawsim bae, hawj vunz nanzlumz.

Laepda mup mbawraeu, sijsaeq dingq gij rumz ndaw bya ci ndaej ndoengfaex yiengjsasa haenx, gou couh lumj yawjraen doenghgij faexraeu lumj dahsien nei cungj riengz rumz diuqfoux.

Aenvih ngamq doek fwn gvaq, gij raemxrij bienq ndaej youh hung youh gip, lumj cienbing fanhmax cunghoho rouxringx coh laj bya bae, hawj bya hung dem le haujlai senggei.

Gou daj laj faexraeu ngiengx-gyauej yawj gwnzmbwn, cij raen gwnz mbwn gaeng fwj hai mok sang, loh ok mbwn lamz mbwn gvengq, geij benq fwjhau fouzmbengmbeng mbin dwk, gij nditndongq engq rongh engq lwenqda lo.

Seizneix gij bya, gij raemx, gij ndit, gij fwj, gij faex…… Cungj gig huzswnh, hawj vunz siengjgyae simmaez. Gyoengq baengzyoux cungj yungz haeuj gij gingjsaek daegbied neix bae caez.

“Gaca, gaca……” Mbouj rox seizlawz, baengzyoux gaeng caegcaeg ingj gij gingjsaek maezvunz neix roengzdaeuj lo. Gyoengqdou hix cungj youq mbawsiengq de ingj ndawde——Mwh dou yawj funggingj seiz, hix baenz aen funggingj lo.

Seizhah doek fwn gvaq, gingjsaek Sizvandasanh Swnhlinz Gunghyenz lumj dozveh nei, gizneix dwg gaiq dieg hawj ndawsim seuqsak ndeu, baez daeuj couh sij mbouj ndaej lizbae.